

Bosna i Hercegovina
Federacija Bosne i Hercegovine
Zeničko-dobojski kanton
OPĆINA VAREŠ
OPĆINSKO VIJEĆE
-Stručna služba Općinskog
vijeća i Općinskog načelnika-



Broj: 01-74/10
Vareš, 04.03. 2010. godine

Z A P I S N I K
s 16. sjednice Općinskog vijeća Vareš,
održane 04.03. 2010. godine

Josip Malbašić – predsjedavajući Općinskog vijeća Vareš, otvorio je 16. sjednicu s početkom u 9 sati, u velikoj sali Općine Vareš.

Izvršena je prozivka vijećnika.

Prisutni vijećnici: Ismet Abdulahović, Dženana Bešić, Tajiba Brkić, Dženana Hafizović, Izudin Ibrišimović, Kenan Kamenjaš, Džemo Kevrić, Milan Knežević, Ešref Likić, Ivan Lučić, Josip Malbašić, Željko Matić, Mario Mirčić, Majda Muftić, Mato Pavić, Elvir Rožajac, Jasmin Salketić, Dragan Sekulić, Nikola Šimić i Jelena Zlobec.

Odsutni: Jelena Kuhač-Odenwald.

Pored vijećnika sjednici prisustvuju: općinski načelnik Hamdo Fatić, sekretar Općinskog vijeća Leon Pavlović, pomoćnici općinskog načelnika, predsjednici političkih stranaka, komandir PS Vareš – Meho Bajrić, te predstavnici JKP d.o.o. Vareš – Mirko Vukančić i Zafer Kamenjaš.

Sekretar Općinskog vijeća izvijestio je Vijeće o realizaciji zaključaka s prošle sjednice Vijeća i dostavljenim odgovorima na vijećnička pitanja. Od donesenih 9 zaključaka 5 je realizirano, 2 zaključka su u toku realizacije, a za preostala 2 Služba Općinskog vijeća nije obaviještena o njihovom provođenju. Na 15. sjednici je postavljeno 10 vijećničkih pitanja, na 9 je dostavljen pismeni odgovor vijećnicima, dok na jedno vijećničko pitanje koje je bilo više kao sugestija općinskom načelniku, nije odgovoreno.

Općinski načelnik Hamdo Fatić u okviru aktuelne problematike na području općine Vareš izvijestio je Vijeće da je 24.02. ove godine bila kontrola ISO standarda i da nije bilo nikakvih neusklađenosti, te je ocjena bila pozitivna.

(V i j e ć n i č k a p i t a n j a)

Elvir Rožajac

1. Zašto ulična rasvjeta od Općine do Doma zdravlja nije u funkciji?
2. Dokle se došlo s realizacijom vodovoda za Zubeta?
Napomenuo je da je dogovoreno da se uz rješavanje vodovoda za Budoželje rješava i pitanje vodovoda za Zubeta.

Tajiba Brkić

3. Kad će se oprat grad od zimske prljavštine?
4. Može li se zgrada bivšeg stacionara u Vareš Majdanu iskoristiti za neke potrebe?
Smatra da je šteta da takva zgrada i dalje propada.

Milan Knežević

5. Je li išta urađeno na tome da se vlasnik poslovnih prostora: robne kuće u Vareš Majdanu, bivše samoposluge u Varešu i poslovnog prostora u Matijevićima, natjera da ove objekte dovede u upotrebno stanje? Ako nije, šta nadležne službe misle poduzeti po ovom pitanju?
6. Na zahtjev jednog broja građana traži da se pošalje upit Apotekama Sarajevo, da se za vrijeme vikenda i praznika uvede dežurstvo u Apoteci Vareš.

Ivan Lučić

7. Traži da općinski načelnik upozna Vijeće dokle se došlo s realizacijom zaključka s 13. sjednice Općinskog vijeća, a vezano za uvođenje ulične rasvjete u sistem Zakona o komunalnim djelatnostima. Napomenuo je da je rok za realizaciju zaključka bio 01.03.2010. godine.

Džemo Kevrić

Izjasnio se da nije zadovoljan odgovorom koji je dobio na jedno vijećničko pitanje s prošle sjednice, a na drugo nije dobio odgovor. Traži da mu se odgovori, vezano za izgradnju "spomen česme" šehidima na području grada Vareša.

8. Prije godinu dana Klub vijećnika BPS-a je tražio da se urede i očiste prostorije bivše samoposluge i iskoriste za otvaranje neke trgovinske radnje. Budući da su upoznati da je bilo zainteresiranih za taj prostor, traže da im se odgovori zašto to nije realizirano?
9. Zašto se u Varešu ne održava svečana sjednica Općinskog vijeća, povodom Dana nezavisnosti BiH?

Mario Mirčić

10. Na zahtjev dijela građana, traži da se komunalni inspektor više angažira na provođenju Odluke o komunalnom redu, u dijelu grada ispred bivše Invest banke i oko Kule "C".
11. Kad će se nastaviti izgradnja javne rasvjete u MZ Pržići?

Jelena Zlobec

12. Skrenula pozornost da javna rasvjeta od autobusne stanice do Dabravina nije u funkciji, te sugerirala da se uzme u obzir i taj dio, prilikom rješavanja problema javne rasvjete.
13. Je li istina da je iz laboratorija u Vareš Majdanu prenesena oprema u Dom zdravlja Vareš?

Ismet Abdulahović

14. Budući da je sve više radnika na čekanju te nemaju riješeno zdravstveno i socijalno osiguranje, kao ni njihove obitelji, sugerira nadležnoj općinskoj službi da pošalje upit nadležnoj inspekciji i traži rješenje ovog problema.

Željko Matić

15. Traži da mu se dostavi odgovor komunalnog inspektora koji je izlazio na teren, vezano za put od "Šarene kuće" prema Tribiji, budući da je Kanton poslao upit MZ: "Odvija li se tu javni promet?"

Mato Pavić

16. Može li se vlasnik bivšeg stacionara u Vareš Majdanu natjerati da zaštiti objekt od daljnjeg propadanja?

Nikola Šimić

17. Postoji li mogućnost da se ugrade filtri ili nešto slično na dimnjak srednje škole, koji užasno prlja okoliš?
18. Planira li se što uraditi na sanaciji lokalnih cesta i na koji način će se to realizirati? Sugerira da radnici nadležne službe izađu na teren i snime stanje lokalnih cesta, budući da je postalo nemoguće voziti.
19. Upoznao Vijeće da još uvijek nije riješen problem javne rasvjete u naseljima: Matijevići, Jušići i Benići.

Jasmin Salketić

20. Koje kriterije koristi menadžment Doma zdravlja Vareš prilikom određivanja radnog vremena u terenskim ambulancama? Neke su pokrivene radom 8 sati dnevno, neke 4 sata, pojedine 2 sata, a ima ambulanti koje su pokrivene samo terapijski.

Nakon vijećničkih pitanja na raspravu je stavljen zapisnik s 15. sjednice Općinskog vijeća.

Vijećnik Ivan Lučić stavio je primjedbu što u zapisnik nije unesen amandman Kluba vijećnika SDP-a na Program rada općinskog načelnika za 2010. godinu. Amandman je usuglašen s općinskim načelnikom, i to da se do 30.09.2010. godine napravi nova sistematizacija radnih mjesta za Jedinствeni općinski organ uprave Općine Vareš.

Predsjedavajući Josip Malbašić je objasnio da je taj amandman, budući da je prihvaćen od strane općinskog načelnika, postao sastavni dio Programa rada općinskog načelnika za 2010. godinu, i nije bilo potrebe unositi ga u zapisnik.

Nije bilo daljnje rasprave i predsjedavajući je stavio na izjašnjavanje zapisnik, a nakon izjašnjavanja vijećnika konstatovao da je **jednoglasno usvojen zapisnik s 15. sjednice Općinskog vijeća Vareš.**

Na raspravu je stavljen prijedlog dnevnog reda iz poziva za sjednicu.

Nije bilo primjedbi i predsjedavajući je stavio na glasanje predloženi dnevni red.

Nakon izjašnjavanja vijećnika konstatuje da je **jednoglasno usvojen s l i j e d e ć i**

D n e v n i r e d

1. **Prijedlog Odluke o zaštitnim zonama i zaštitnim mjerama izvorišta "Očevlje" za snabdijevanje vodom za piće Vareša (k.o. Očevlje, k.č.br. 407, 408, 409/2, 411, 412),**
2. **Prijedlog Odluke o zaštitnim zonama i zaštitnim mjerama lokalnih izvorišta za snabdijevanje vodom za piće Vareša i to: Selište, Gašina stijena, Sedrenik, Semizova Ponikva, Brlog, Bukov potok i Studeni izvor (Mrestilište),**
3. **Prijedlog Odluke o zaštitnim zonama i zaštitnim mjerama lokalnih izvorišta za snabdijevanje vodom za piće Vareš Majdana, i to: Jarčići, Saški potok, Perun, Trifkovića potok, Čamilov potok, Prnjavor i Planiničko vrelo,**
4. **Prijedlog Odluke o zaštitnim zonama i zaštitnim mjerama izvorišta Budoželje, Lalića mlin, Kokošćići i Dabravine koja su predana na upravljanje JKP d.o.o. Vareš od strane Općinskog vijeća Vareš za snabdijevanje vodom za piće naseljenih mjesta koja gravitiraju ovim izvorištem,**
5. **Izvještaj o radu PS Vareš, s ocjenom stanja sigurnosti za 2009. godinu,**
6. **Informacija o stepenu realizacije razvojnih programa iz Strategije razvoja općine Vareš – 2006. – 2015. godine,**
7. **Informacija o zaposlenosti u državnom i privatnom sektoru u svim oblastima, s podacima o nezaposlenosti na području općine Vareš,**
8. **Informacije o projektima obnove stambenih objekata na području općine Vareš u 2009. godini,**
9. **Izvještaj o realizaciji Programa rada Općinskog vijeća Vareš za 2009. godinu,**
10. **T e k u ć a p i t a n j a .**

Na izjašnjavanje je stavljen prijedlog da se za prve četiri tačke vodi zajednička rasprava, s obzirom da su vrlo bliske po svom sadržaju, a nakon provedene rasprave da se Vijeće izjasni za svaku tačku pojedinačno.

Prijedlog je **jednoglasno usvojen**.

Otvorena je rasprava za tačke **Ad. 1.; Ad. 2.; Ad. 3. i Ad. 4.**, u kojoj su sudjelovali i iznijeli stavove svojih klubova, kao i svoje osobne, vijećnici: Dženana Bešić, Ismet Abdulahović, Ivan Lučić, Kenan Kamenjaš, Mato Pavić, Mario Mirčić, Majda Muftić, Elvir Rožajac, Željko Matić, Džemo Kevrić, Tajiba Brkić, Milan Knežević, predsjedavajući Općinskog vijeća Josip Malbašić, općinski načelnik Hamdo Fatić, predstavnici JKP d.o.o. Vareš – Mirko Vukančić i Zafer Kamenjaš.

Predsjedavajući je napomenuo da su amandmani koji su dostavljeni u materijalu od strane predlagača, sastavni dio odluka.

Općinski načelnik, kao predlagač, obrazložio je ove tačke dnevnog reda i izjasnio se da prihvaća amandman iz rasprave da se u članu 6. odluka, na kraju teksta dodaju riječi "**i prema validnoj projektnoj dokumentaciji**". Objasnio je da će se odmah nastaviti s donošenjem zaštitnih zona i zaštitnih mjera i za ostala izvorišta. Prvo za ona za koja postoji projektna dokumentacija i ostali papiri, bez obzira jesu li predana na upravljanje JKP d.o.o. Vareš, ali po inicijativi mjesnih zajednica.

Nakon zaključene rasprave, predsjedavajući je stavio na izjašnjavanje svaku tačku pojedinačno, zajedno sa stavovima Komisije za statutarna pitanja i propise, amandmanima koji su dostavljeni u pismenom obliku u materijalu za Vijeće i amandmanom na član 6. koji je predložen u raspravi.

Ad. 1.

(Prijedlog Odluke o zaštitnim zonama i zaštitnim mjerama izvorišta "Očevlje" za snabdijevanje vodom za piće Vareša (k.o. Očevlje, k.č. br. 407, 408, 409/2, 411, 412)

Stav Komisija za statutarna pitanja i propise je da se u nazivu Odluke brišu katastarske općine, odnosno kompletan tekst u zagradi: "(k.o. Očevlje, k.č. br. 407, 408, 409/2, 411, 412)".

Da se u članu 37., umjesto riječi "danom donošenja" navede "osmog dana od dana objavljivanja na oglasnoj ploči Općine Vareš".

Nakon izjašnjavanja vijećnika po ovoj tački konstatovano je da je većinom glasova, 13 za i 7 suzdržanih, **donešana**

Odluka o zaštitnim zonama i zaštitnim mjerama izvorišta "Očevlje" za snabdijevanje vodom za piće Vareša

Ad. 2.

(Prijedlog Odluke o zaštitnim zonama i zaštitnim mjerama lokalnih izvorišta za snabdijevanje vodom za piće Vareša i to: Selište, Gašina stijena, Sedrenik, Semizova Ponikva, Brlog, Bukov potok i Studeni izvor (Mrestilište)

Komisija za statutarna pitanja i propise je zauzela stav da se u članu 30. napravi ispravka, te umjesto riječi "danom donošenja" navede "osmog dana od dana objavljivanja na oglasnoj ploči Općine Vareš".

Nakon izjašnjavanja vijećnika konstatovano je da je većinom glasova, 13 za i 7 suzdržanih, **donešana**

Odluka o zaštitnim zonama i zaštitnim mjerama lokalnih izvorišta za snabdijevanje vodom za piće Vareša i to: Selište, Gašina stijena, Sedrenik, Semizova Ponikva, Brlog, Bukov potok i Studeni izvor (Mrestilište)

Ad. 3.

(Prijedlog Odluke o zaštitnim zonama i zaštitnim mjerama lokalnih izvorišta za snabdijevanje vodom za piće Vareš Majdana, i to: Jarčiči, Saški potok, Perun, Trifkovića potok, Čamilov potok, Prnjavor i Planiničko vrelo)

Stav Komisije za statutarna pitanja i propise je da se u članu 30. napravi ispravka, te umjesto riječi "danom donošenja" navede "osmog dana od dana objavljivanja na oglasnoj ploči Općine Vareš".

Nakon izjašnjavanja vijećnika konstatovano je da je većinom glasova, 13 za i 7 suzdržanih, **donesena**

Odluka o zaštitnim zonama i zaštitnim mjerama lokalnih izvorišta za snabdijevanje vodom za piće Vareš Majdana, i to: Jarčiči, Saški potok, Perun, Trifkovića potok, Čamilov potok, Prnjavor i Planiničko vrelo

Ad. 4.

(Prijedlog Odluke o zaštitnim zonama i zaštitnim mjerama izvorišta Budoželje, Lalića mlin, Kokošiči i Dabravine, koja su predana na upravljanje JKP d.o.o. Vareš od strane Općinskog vijeća Vareš za snabdijevanje vodom za piće naseljenih mjesta koja gravitiraju ovim izvorištem)

Komisija za statutarna pitanja i propise predložila je da se u nazivu Odluke brišu riječi: "KOJA SU PREDANA NA UPRAVLJANJE JAVNOM KOMUNALNOM PODUZEĆU D.O.O. VAREŠ OD STRANE OPĆINSKOG VIJEĆA VAREŠ"

Isto tako, Komisija je zauzela stav da se u članu 30. napravi ispravka, te umjesto riječi "danom donošenja" navede "osmog dana od dana objavljivanja na oglasnoj ploči Općine Vareš".

Nakon izjašnjavanja vijećnika konstatovano je da je većinom glasova, 13 za i 7 suzdržanih, **donesena**

Odluka o zaštitnim zonama i zaštitnim mjerama izvorišta Budoželje, Lalića mlin, Kokošiči i Dabravine za snabdijevanje vodom za piće naseljenih mjesta koja gravitiraju ovim izvorištem

Predsjedavajući je stavio na izjašnjavanje i zaključak predložen u raspravi, kojim se **obavezuje općinski načelnik da u saradnji s mjesnim zajednicama nastavi donošenje odluka o zaštitnim zonama i zaštitnim mjerama preostalih izvorišta koja se koriste za snabdijevanje pitkom vodom stanovništva u tim mjesnim zajednicama.**

Većinom glasova, 13 za i 7 suzdržanih **usvojen je predloženi zaključak.**

Ad. 5.

(Izveštaj o radu PS Vareš s ocjenom stanja sigurnosti za 2009. godinu)

U raspravi o ovoj tački dnevnog reda sudjelovali su i iznijeli svoje primjedbe i prijedloge, vijećnici: Mato Pavić, Željko Matić, Ismet Abdulahović, Ivan Lučić, Tajiba Brkić, predsjedavajući Josip Malbašić i komandir PS Vareš – Meho Bajrić, koji je obrazložio Izveštaj i odgovorio na pitanja vijećnika.

Na temelju provedene rasprave predsjedavajući je predložio da se Izveštaj usvoji uz **zaključak da u okviru mjera koje su predložene u Izveštaju, poseban akcent stavi na sigurnost prometa na dijelu regionalnog puta od Vareša do Odvojka, kao i na sigurnost objekata i ljudi u Mjesnoj zajednici Vijaka.**

Nakon izjašnjavanja vijećnika konstatuje da je većinom glasova, 19 za i 1 suzdržani, **usvojen**

Izveštaj o radu PS Vareš s ocjenom stanja sigurnosti za 2009. godinu

Ad. 6.

(Informacija o stepenu realizacije razvojnih programa iz Strategije razvoja općine Vareš – 2006. – 2015. godine)

Otvorena je rasprava u kojoj su sudjelovali i iznijeli svoje primjedbe i prijedloge, vijećnici: Dženana Bešić, Elvir Rožajac, Ismet Abdulahović, Ivan Lučić, Mato Pavić, predsjedavajući Josip Malbašić, Čedomir Jelić – pomoćnik općinskog načelnika i općinski načelnik Hamdo Fatić, koji je obrazložio Informaciju i primjedbe vijećnika.

Nakon zaključene rasprave predsjedavajući je Informaciju stavio na izjašnjavanje, a nakon izjašnjavanja konstatovao da, s 10 glasova za, 3 protiv i 7 suzdržanih, **Informacija nije dobila potrebnu većinu glasova.**

Ad. 7.

(Informacija o zaposlenosti u državnom i privatnom sektoru u svim oblastima, s podacima o nezaposlenosti na području općine Vareš)

U raspravi o ovoj tački dnevnog reda sudjelovali su vijećnici Ivan Lučić i Džemo Kevrić, koji su predložili da se Informacija povuče i vrati na doradu, za slijedeću sjednicu Vijeća.

Općinski načelnik, kao predlagač, povukao je Informaciju s dnevnog reda današnje sjednice i obećao da će biti pripremljena za slijedeću sjednicu Općinskog vijeća.

Ad. 8.

(Informacije o projektima obnove stambenih objekata na području općine Vareš u 2009. godini)

Vijećnica Dženana Bešić iznijela je stav Kluba vijećnika SDA da će prihvatiti Informaciju i sugerirala da, kad se dobiju podaci sa spiskovima iz donacija Hrvatske vlade, da se dostave Vijeću kao Informacija.

Nije bilo daljnje rasprave i nakon izjašnjavanja vijećnika konstatovano je da je **jednoglasno prihvaćena**

Informacije o projektima obnove stambenih objekata na području općine Vareš u 2009. godini

Ad. 9.

(Izveštaj o realizaciji Programa rada Općinskog vijeća Vareš za 2009. godinu)

Sekretar Leon Pavlović obrazložio je Izveštaj o realizaciji Programa rada Općinskog vijeća.

U raspravi su sudjelovali vijećnici: Džemo Kevrić i Ivan Lučić i izjasnili se da će podržati Izveštaj zajedno s predloženim zaključcima.

Nakon zaključene rasprave predsjedavajući je Izveštaj s predloženim zaključcima stavio na izjašnjavanje, te konstatovao da je **jednoglasno prihvaćen**

Izveštaj o realizaciji Programa rada Općinskog vijeća Vareš za 2009. godinu, kao i slijedeći zaključci:

- 1. Da rukovoditelj organa uprave – općinski načelnik i službe za upravu Općine Vareš daleko više i odgovornije pristupe pripremi i realizaciji utvrđenih zadataka iz Programa rada Općinskog vijeća.**
- 2. Zaključci i zaduženja koja donosi Općinsko vijeće Vareš, a odnose se na općinskog načelnika i nadležne službe, budu u zadanom roku i realizovani, odnosno da Općinsko vijeće i Stručna služba Općinskog vijeća i općinskog načelnika dobiju kopiju akta iz kojeg je vidljivo da je zaključak, odnosno zaduženje izvršeno, a ako nije, da se Općinsko vijeće pismeno obavijesti o razlozima neizvršenja.**

3. Općinski načelnik, blagovremeno i potpuno, u pismenoj formi daje odgovore na postavljena vijećnička pitanja i inicijative (član 42. Poslovnika o radu OV).
4. Izvještaji – informacije i drugi akti koje razmatra Općinsko vijeće i iste ne usvoji, vrati na doradu ili ih predlagač povuče, obavezuje se predlagač tih akata da postupi po preporukama, odnosno stavovima Vijeća i iste akte ponovo dostavi za prvu narednu sjednicu Vijeća na razmatranje, ili u roku kojeg odredi Vijeće.
5. Kontinuirano raditi na pripremi i obradi materijala za radna tijela Općinskog vijeća (komisije), u cilju afirmacije i jačanja uloge ovih organa koji poslove obavljaju za potrebe Općinskog vijeća i time doprinose efikasnosti, cjelovitosti i djelotvornosti akata koje razmatra i donosi Općinsko vijeće.
6. Općinski načelnik, u okviru izlaganja o aktualnoj problematici, izvijestit će vijećnike o zaključcima Vijeća koji nisu realizirani i o razlozima neizvršenja.
7. Općinski načelnik obavezno poduzima mjere disciplinske odgovornosti prema državnim službenicima i namještenicima koji su odgovorni za neizvršenje određenih zaključaka Općinskog vijeća.
8. Sekretar Općinskog vijeća će na svakoj sjednici Vijeća, prije utvrđivanja dnevnog reda sjednice, Vijeće izvijestiti o realizaciji zaključaka i odgovora na vijećnička pitanja s prethodne sjednice.
9. Kolegij Općinskog vijeća će pripremiti i dostaviti Općinskom vijeću Informaciju o izvršavanju zaključaka Općinskog vijeća u prvom polugodištu i provođenje instituta "Vijećnička pitanja".

Ad. 10.
(Tekuća pitanja)

1. JP "Vareš-stan" d.o.o. Vareš uputilo je Vijeću Informaciju o stanju dimnjaka u stambenim zgradama na području općine Vareš, u kojoj navode da je stanje u ovoj oblasti postalo alarmantno, te žele da se Vijeće upozna s tim i da zauzme određeni stav.

Predsjedavajući je predložio da se Informacija umnoži za narednu sjednicu Vijeća, te uz komentar i prijedloge mjera općinskog načelnika, nadležne službe i inspektora, dostavi Vijeću na razmatranje.

Zaključak je jednoglasno usvojen.

2. Komisija za zaštitu ljudskih prava i sloboda, predstavke, pritužbe, prijedloge i jednakopravnost spolova, razmatrala je predstavku Darije Kuhar iz Vareša, te donijela zaključke koji su dostavljeni Vijeću na razmatranje. Imenovana navodi u predstavci da je završila studij i stekla zvanje – nastavnik predškolskog odgoja, a već deset godina je na evidenciji Službe za zapošljavanje ZE-DO kantona, Biro Vareš, dok istovremeno u JPU "Dječji vrtić" Vareš sa djecom rade osobe bez odgovarajuće stručne spreme.

Predsjedavajući je predložio da se usvoji zaključak Komisije kojim se zadužuje općinski načelnik da za narednu sjednicu Vijeću podnese Informaciju o provođenju Odluke o zadržavanju prava osnivača prema JPU "Dječji vrtić" Vareš, br. 01-135/98 od 30.12.1998. godine,

Većinom glasova, 18 za i 1 suzdržani, usvojen je predloženi zaključak.

3. Vijećnik Ivan Lučić predložio je Vijeću da donese zaključak kojim bi se kod Skupštine ZE-DO kantona pokrenula inicijativa za izmjenu Zakona o građenju, a vezano za rješavanje problema ruševnih objekata u gradu. Pozvao se na član 20. stav 1. alineja 6. i član 112. Statuta općine Vareš, te na član 100. stav 1. tačka d) Poslovnika o radu Općinskog vijeća Vareš – prečišćeni tekst. Obrazložio je svoju inicijativu i objasnio da je Sarajevski kanton donio izmjenu Zakona o građenju u smislu da se objekt sruši na teret budžeta Općine, a da se troškovi knjiže na teret zemljišta koje ostaje u gruntovnici.

Otvorena je rasprava u kojoj su svoje stavove iznijeli vijećnici: Elvir Rožajac, Nikola Šimić, Dženana Bešić i predsjedavajući Josip Malbašić.

Na temelju provedene rasprave predsjedavajući je predložio zaključak kojim se zadužuje općinski načelnik i nadležna služba da provjere zakonske mogućnosti vezano za provođenje ove inicijative, budući da se radi o kantonalnom propisu. U slučaju da Vijeće može biti predlagač izmjene navedenog zakona, da se do naredne sjednice Vijeća pripremi nacrt dokumenta s obrazloženjem za vijećnike, razlozima za donošenje takve inicijative i tačnom adresom na koju akt treba uputiti, koje bi Vijeće usvojilo i prosljedilo nadležnom tijelu na daljnji postupak.

Zaključak je jednoglasno prihvaćen.

4. Vijećnik Mario Mirčić upoznao je Vijeće da se najavljuje izrada novog Zakona o šumama u kome se planiraju formirati nova šumsko-privredna društva za gazdovanje šumama na nivou Federacije, a postojeća kantonalna bi postala odjeljena. Iz tog razloga predložio je da Općinsko vijeće uputi prijedlog, na ruke resornog ministra, da se novim zakonom vrati puni poslovno-pravni subjektivitet šumarijama, što podrazumijeva i Šumariju općine Vareš.

Općinski načelnik je obrazložio ovu problematiku. Izvijestio je Vijeće da je održana sjednica nadležne komisije u Savezu općina i gradova, koja će zauzeti određeni stav i predložiti Vladi Federacije. Sugerirao je da se sačeka izrada Nacrta Zakona o šumama koji uskoro treba biti na Skupštini, a u slučaju potrebe, Vijeće će imati mogućnost zauzeti stav i donijeti konkretan zaključak.

Vijećnik Mario Mirčić je prihvatilo sugestiju općinskog načelnika i povukao svoj prijedlog.

Sjednica je završena u 15,00 sati.

S E K R E T A R

Leon Pavlović

PREDSJEDAVALJUĆI

Josip Malbašić

ZAPISNIČAR

Mira Pejčinović